

壽光縣鄉土志

地 140.79
539
31

壽光縣鄉土志

志建置

壽光縣漢景帝二年置其命名之義不可考或云戰國時齊宣王獵於杜山閭邛先生與長老十三人相與勞王曰欲得壽於王王曰死生有命非寡人所得為也閭邛進曰選良吏平法度臣得壽矣漢置壽光縣義蓋取此

未置本境以前唐虞夏商周地皆屬青州夏之斟灌國周之紀國迭居於此春秋莊公四年紀侯大去其海上而自立地復屬田齊秦始皇二十六年分天下為三十六郡地屬齊郡至漢景帝二年始有今名既置本境以後西漢時屬青州北海郡新莽改曰翼平光武興仍名壽光改屬樂安國兩晉皆仍之劉宋省壽光并入劇北魏同隋開皇六年復置壽光縣屬北海郡十六年於其地分置閭邛縣大業初又并閭邛入壽光唐分青州屬河南道壽光為青州北海郡七縣之一趙宋時屬京東路青州鎮海軍金隸益都



府元隸益都路明洪武中分天下為十三布政使司
置青州府壽光縣屬焉總隸山東省

國朝因之

按壽光之名自兩漢以迄於今千餘年未之或改而
古壽光城實不在今縣治地方今縣治四境亦大於
古壽光遠甚如漢之益縣樂望縣平望縣劇縣元魏
之益都縣皆在今四境內即鉅定縣東境亦屬今壽
光西界

志政績

漢

伏恭字叔齊瑯邪東武人建武四年除劇令視事十
三年以惠政公廉聞青州舉為尤異後仕至司空

元

王玠太原人為壽光尹值歲凶盜起玠建習射亭練
鄉兵以什伍之法藝精器備盜不敢犯民賴以安

明

楊昕括蒼人成化初知壽光縣廉毅鯁直勇於去惡
時有害民者號七虎莫敢誰何昕悉按治之四境安

堵

溫純陝西三原人由進士知壽光縣居官廉明立法
平允革縣內雜役改王府本色輸銀從便申革東平
州驛馬夫止解銀抵補其他修學校廣學田丈地清
賦伸理冤結善政不可枚舉邑人爭勒石鐫木懸之
縣治門堂以垂永久

王國相高陵人由進士知壽光縣時方弱冠恂恂如
儒生而剛正明決老吏莫能及凡健訟憑依城社武
斷鄉曲如王調元李權等皆擒置重法吏民畏若神
明有富民某詭納賦藩府國相覈其實弊以除德府
來爭民焚地據理折服府閩民賴以安平反冤獄紀
持毛國樂等二十餘家一時賢令羣推為首

劉昇祚汾陽人崇禎時由進士知壽光縣性彊敏精
吏治邑城舊惟土墉莅任後慨然曰壽為海濱壯縣
而城庳圯若是世將亂矣一旦烽火有警父老子弟
將何以守乃鳩衆力以磚石甃之未浹歲而巍然巖
邑矣

李耿字道廉直隸大興人居官多惠政而愛士尤為

無倫崇禎壬午邑城夜陷耿具衣冠赴火死至今邑人談其節烈尚嘖嘖不能置

國朝

劉有成字聖績三韓人精吏治而以廉惠劑之莅事七年政聲達於遠邇時單騎從數人行阡陌間勸課農桑諭以勤儉孝友聽者媿媿忘倦歲旱蝗率衆往撲於烈炎中是歲蝗不為災又於倉聖墓側建啟秘亭穹以橋梁遠以廊榭週圍皆種柳植荷門前葭茨數畝青蔥可愛使城闌風景宛似江鄉彬彬然古之

良吏也

宮懋讓江南泰州人乾隆十年知壽光縣練達有才十

一年瀰水決於屯田村長百餘丈下流數十里盡為澤國民不聊生懋讓力請於上官發帑修築屹屹長隄居民至今賴焉

王椿字大春河南輝縣人由進士知壽光縣首以學校為重建同文書院於倉聖墓前延師課藝隨時考校壽光征糧之法舊設六鄉二百零五社十隅社有社約隅有隅頭遵行滾單挨次遞催日久弊生往往

一單出不能指某戶隸某莊某莊隸某鄉錯綜變亂
莫可稽查土田詞訟因之糾紛歷久難決椿乃裁去
社隅名目立順莊之法將六鄉附近各莊查清編定
戶口地畝銀兩均勻酌配分為約數俾何鄉若干約
何約若干莊何莊若干戶何戶若干賦皎若列眉絲
毫不紊春秋開征時有縣總有鄉總有莊總公同催
辦無脫漏亦無混舛其有田土交易飭戶房按年收
退清晰照造赤書為征糧根據由是宿弊盡去官民
交便迄今猶用其法

艾保民奉天人由諸生於乾隆二年任壽光縣丞寬
和坦易遇公事侃侃不阿三年蝗生樂安境蔓延於
淄水之濱樂令驅蝗過界並指境內荒坡為壽光地
意在嫁害鄰氓自謝厥咎保民往勘爭之曰淄水為
兩縣分界豈容或紊吾不敢以一時之遷就貽累後
人樂令怒突前手擊之保民搥其胸相與俱溺於河
事聞上憲直保民而黜樂令

吳樹聲字筱亭雲南保山人同治七年由舉人大挑
知壽光縣博學能文精於吏治先是壽光縣試近二

千人試時或在縣署或在大成殿前廷皆用葦席障
其外畧備桌倚不足則應試者自覓每風雪嚴寒大
雨傾注不能書一字往往至於曳白人皆苦之樹聲
至慨然曰此非所以恤文士也於是大建北海書院
首捐廉千三百金規模宏敞器具周備廣廈萬間寒
士盡庇矣光緒二十九年改為小學堂迄今遊斯地
者猶曰此吳公遺制也

志兵事

寒浞滅斟灌

夏后相畏羿逼遷於高邛依斟灌羿之相寒浞復誘
羿家衆逢蒙使殺羿遂因羿室生澆及豷後使澆用
師滅斟灌及斟尋並弑后相后緡方娠逃出自竇
歸於有仍遺臣靡奔有鬲後緡生少康於有仍為仍
牧正復自有仍奔虞為虞庖正虞君思妻以二姚而
邑諸綸有田一成有衆一旅能布夏德而兆其謀以
收夏衆撫其官職遺臣靡遂自有鬲氏收斟灌斟尋
之燼以滅浞而立少康

齊襄公滅紀

周夷王時紀侯譖齊哀公於周周烹哀公哀公九世孫襄公復其讐春秋莊公元年遷紀郟郟之民而取其地紀懼見滅乃使紀季以郟入於齊為附庸冀存先祀至莊公四年紀侯遂違齊難而大去其國

張步都劇

王莽末漢兵起瑯邪不其人張步亦聚眾數千轉攻旁縣旋理兵於劇徇下東萊濟南北海諸郡時光武方北憂漁陽南事梁楚故步得專集齊地據郡十二至建武五年光武詔建威大將軍耿弇率都尉劉歆泰山太守陳俊討步先斬其大將費邑於巨里又走其弟藍精於西^兵安藍率眾歸劇弇時在臨淄乃令軍中無得妄掠劇下須張步至乃取之以激怒步步聞大笑曰以尤來大彤十餘萬眾吾皆即其營破之今大耿兵少於彼又皆疲勞足可破乎乃與弟藍宏壽等兵號二十萬至臨淄將攻弇弇故示弱以誘之步氣盛直攻弇營與劉歆等合戰弇升壞台望之視歆等鋒交乃引精兵以橫突步陣大破之至暮罷明日復戰自旦至暮又大破之弇知步困將退預置左右

翼伏以待人定時步果引去兵起縱擊追至鉅昧水上八九十里僵尸相屬步奔還劇旋降後以欲招其故衆乘船入海為陳俊所誅

撚匪之亂

咸豐十一年二月撚匪至壽光是時承平日久民不知兵聞賊信息即紛紛逃匿糧粒衣服委棄充物絕無顧惜故賊迹所至皆携持纍纍飽其欲而去至八月又至其酋張總愚駐李家營村村藉丹水兩岸為堡中有善鳥銃者窺總愚手摘葡萄而食因轟擊中其中指酋大怒攻破土堡殺戮甚慘其由北鄙過者與七里莊王姓周家疿袁姓道口莊孫姓接仗諸姓皆大族工拳勇聞賊至爭持梃刃以待然素無紀律又衆寡不敵遂為所敗殺戮亦無算侯鎮堡被賊酋劉天福困圍數日力守不懈始解去自是民有戒心競築堡以謀避寇矣至同治五年五月任柱賴文光諸酋復至然為官軍所追息息不久駐民間又皆入堡自守賊至無所得故專擄人以易馬至十月賊由濰竄新城復折而東為劉軍門銘傳追擊於瀰河洋

河之交殲賊近三萬人賊之精銳器械羸馬輜重拋棄靡遺夜竄棗林中值天陰昏黑觸樹結髮者號呼不絕明旦村民出堡視之野狐北馮諸村尸填溝渠皆滿有四五人共縊一梁者搜其遺訊之已不食五日矣賊自咸豐末年肇亂裹脅日多至有衆數十萬有馬數萬匹震蕩飄忽聚散無常難以僧親王之英勇曾督師之謀略猶屢為所挫至是始聚而殲旃

志耆舊

漢

滕撫字叔輔順帝時人有文武才是時九江范容周生等反據歷陽陰陵人徐鳳衣絳衣帶黑綬稱無上將軍馬勉皮冠黃衣帶玉印稱皇帝築宮當塗山中廣陵賊張嬰亦聚衆數千據廣陵諸將不能制乃拜撫為九江都尉合州郡兵數萬人進討皆擊斬之又歷陽華孟自稱黑帝亦為撫所破斬東南悉平振旅而還

詳見漢書本傳

徐幹字偉長獻帝時人篤行體不耽世榮除上艾長辭疾不就與魯國孔融廣陵陳琳山陽王粲陳留阮

瑀汝南應瑒東平劉楨號建安七子魏文帝嘗稱之
曰觀自古文人類不護細行鮮能以名節自立而偉
長獨懷文抱質淡泊寡欲可謂彬彬之君子矣所著
中論二十篇粹然儒者之言宋曾鞏校館閣書時亟
稱之

三國

滕允字承嗣仕於吳每上表陳及時宜及民間優劣
多所匡弼聽斷詞訟察言觀色務盡情理人有冤苦
之言對之流涕吳主亮即位與諸葛恪受遺輔政恪
將伐魏允諫曰君以喪代之際受伊霍之託入安本
朝出推強敵名聲振於海內天下莫不震動萬姓之
心冀得蒙君而息今猥於勞役之後興師出征民疲
力屈遠主有備若攻城不克野略無獲是喪前勞而
招後責也不如按甲息師觀隙而動恪不聽後果敗
詳見三國志吳書本傳

晉

王猛字景略博學好兵書氣度雄遠細事不干其慮
隱於華陰山桓溫入關披褐往詣之捫蝨而談當世

之事旁若無人秦王苻堅聞其名遣呂婆樓招之一
見便若平生語及興廢大事異符同契若元德之遇
孔明也後為丞相都督中外諸軍事剛明清肅善惡
著白放黜尸素顯拔幽滯勸課農桑練習軍旅官必
當才刑必當罪由是國富兵強秦國大治廣平麻思
流寄關右因母亡歸葬請還冀州猛謂思曰便可速
裝是暮已符卿發遣及始出關郡縣被符管攝其令
行禁整事無留滯如此及疾篤堅親臨問以後事猛
曰晉雖僻處江南然正朔相承上下安和臣歿之後
願勿以晉為圖鮮卑西羌戎之仇敵終為大患宜漸
除之以便社稷堅不能用後果以伐晉敗亡

詳見晉書本傳

劉宋

王鎮惡猛之孫以五月五日生家人以俗忌欲令繼
疎宗猛曰此非常兒昔孟嘗君以惡月生而相齊是
兒亦將興吾門矣故名曰鎮惡苻堅敗歸晉客荊州
頗讀諸子兵軍書喜論軍國大事劉裕伐廣固或薦
之裕召與語因留宿旦謂諸將曰鎮惡王猛孫所謂
將門有將及裕北伐鎮惡行龍驤將軍領前鋒先發

入賊境戰無不捷至潼關為賊所拒不得進與劉裕
謀進取計鎮惡請率水軍自河入渭直至渭橋鎮惡
所乘皆蒙衝小艦行船者悉在船內泝渭而進艦外
不見有行船人莫不驚以為神鎮惡既至令將士食
畢便棄船登岸渭水流急諸艦悉逐流去鎮惡撫士
卒曰此是長安城北門去家萬里而舫乘衣糧並已
逐流唯宜死戰可立大功乃身先士卒即陷長安城
詳見宋書本傳

北魏

王昕字元景性方正太尉汝南王悅辟為騎兵參軍
悅好逸遊或馳騁信宿昕輒棄還悅數散錢於地令
諸佐爭拾之昕獨不拾悅又散銀錢以目昕乃拾其
一悅與府僚飲起自移牀人爭進手昕獨執板卻立
悅責其偃蹇昕曰安敢以親王察案從厠養之役坐
上皆引滿酣暢昕先起卧於閑室頻召不至悅乃自
往詣呼曰懷其才而忽其主可謂仁乎昕曰商辛沈
酒其亡也忽諸府主自忽傲察佐敢任其咎太昌初
為吏部尚書武帝或袒露與近臣狎戲每見昕即斂

容正冠所體素肥遭喪後遂終身羸瘠楊愔重其德
以為人之師表

詳見魏書本傳

宋

于燾字彭年仁宗時人博學能文頗喜言兵慶曆中
元昊數寇邊北人乘釁求關南地丞相呂文靖召燾
計之燾云宜治西北行宮若將親征以壓其謀乃以
大名府為北都二虜果請盟仁宗春秋高皇嗣未立
登州岨嶠山數震燾上疏曰岨嶠極東方殆東朝未
建人心動搖之象宜早定儲以安天下逮英宗入繼

由齊邸人以先識目之

劉概字孟節仁宗時人天姿絕俗篤古好學酷嗜山
水青州南有冶原古歐冶子鑄劍之地山奇水清叢
筠古木氣象幽絕概欲隱其間時富弼守青州為築
室泉上詩以餞之曰先生已歸隱山東人物空其後
范仲淹文彥博皆優禮之欲薦諸朝概懇辭不就少
時曾寓龍興寺僧舍往往凭欄獨立感懷時事手拍
欄干唏吁太息有詩曰昔年曾作瀟湘客憔悴東秦
歸未得西軒忽見好溪山如何尚有楚鄉憶讀書誤

我四十年幾回醉把欄干拍

元

李裕字好問幼敏慧日記數千言從鄒平張長白遊講明理學不尚科目弟子至數百人其才雋而貧者必委曲成就之講敦睦尚禮法鄉人化焉自號海濱逸人

李庭本金蒲察氏金末徙中原改姓李先居濟陰後徙居壽光元至正六年以材武選累遷中書左丞後東征日本遇風壞船漂流抵高麗得還宋王乃顏叛從世祖征之流矢中胸貫脇裹創復戰令軍中修百弩俟敵仍持火礮夜入其陣敵驚潰遂縛乃顏以獻卒封益國公謚武毅

陳忠兄弟四人同財而居孝友雍睦為鄉里稱重生子海海生山及讓守家法不變大德八年被旌

明

趙銓字景衡永樂中由貢士任漂陽縣知縣蒞事九年政通人和成祖召至闕賜衣一襲珊瑚一株寶鈔萬貫仕至紹興府知府

劉昂字宗曦英宗時人通經史善詩文性冲尚不慕榮利晚號松溪居士隱居教授子六人多顯達時人為之語曰燕山竇十郎松溪劉居士教子有義方千載總相似憲宗時曾聘至闕下辭不受職後以子珣貴封太子太保戶部尚書

劉珣字叔溫生而穎悟五歲時有老人相之曰是兒面有紋類丞字後必為相正統十三年成進士累官至太子太保謹身殿大學士直經筵日每進講反復開導詞氣侃侃聞者為悚學士劉定之稱為講官第一入內閣預機務宣宗極重之每稱為東劉先生而不名賜印章一文曰嘉猷贊珣然性疎直自以宮僚舊臣遇事無所回護卒為萬安劉吉所排擠致仕歸歸後父母歿皆廬墓三年卒謚文和嘉靖初賜祠額曰昭賢令有司春秋致祭焉著有青宮講義古直文集若干卷詳見明史本傳子欽字汝忠蔭補中書舍人累官至太常寺卿嫻於文筆與李崆峒康對山何大復邊華輩為友時稱五才子所著曰西橋集

劉澄甫字子靜大學士珣之孫也正德三年成進士

累官廣西道監察御史博學淹雅善詩文而居官尚
風厲巡兩淮鹽課豪商李宣納資為指揮橫行江淮
間澄甫擒治之人心大快巡按大同首劾代藩與鎮
巡相結為害者太監張忠提軍出塞澄甫監之裁以
正律兵得勿擾擢山西參議駐偏頭關值武宗西巡
澄甫供事惟敏地方賴之武宗關東宮疏請選宗室
之賢者育宮中蒙賞賚甚厚尋致仕歸與弟漢陽知
府淵甫共青州先達馮閻山楊澗谷輩結詩社著有

山泉集

劉三宅字可任參議劉澄甫之孫由進士授永嘉令
才識敏練剖決如流以卓異徵授吏科給事中時張
居正用事政多操切三宅疏請崇寬大養元氣居正
甚銜之會暴疾卒惜不竟其用

黃甄景泰甲戌進士選庶吉士改工科給事中天順
中陝西大水甄上疏賑救稱旨成化三年南京雷震
午門正樓甄上疏修省語涉忌諱權璫夏時從中構
之降陝州知州十八年不調陝人感其德祀之於名

宦祠